

Rregullore e Komisionit Kombëtar për UNESCO-n

KRIJIMI

Komisioni Kombëtar Shqiptar për UNESCO-n është krijuar me vendim Nr. 36, datë 28.01.2000 të Këshillit të Ministrave të Republikës së Shqipërisë.

Komisioni Kombëtar është një organizëm që bashkëpunon ngushtë me Ministrinë e Punëve të Jashtme, Ministrinë e Arsimit dhe Shkencës, Ministrinë e Kulturës, Rinisë dhe Sporteve, si dhe me shoqërinë civile, nëpërmjet përfaqësuesve të tyre në Komisionin Kombëtar.

OBJEKTIVAT

1. Të asociojë në veprimtarinë e tij përfaqësues të qeverisë dhe të shoqërisë civile.
2. Të identifikojë pikat e konvergencës ndërmjet axhendës kombëtare dhe asaj shumëpalëshe të adoptuar nga shtetet anëtare gjatë Konferencës së Përgjithshme të UNESCO-s.

FUNKSIONET

1. Këshillon qeverinë në të gjitha fushat që mbulon UNESCO, sipas programeve të saj.
2. Shërben si koordinator ndërmjet UNESCO-s dhe departamenteve ministrore, instituteve, organizatave dhe individëve, që janë të interesuar për përparimin e arsimit, shkencës, kulturës dhe informimit në Republikën e Shqipërisë.
3. Bën të njohur objektivat dhe qëllimet e UNESCO-s, nëpërmjet angazhimit të qarqeve intelektuale-shkencore, në procesin e përgatitjes dhe të zbatimit të programeve të UNESCO-s.
4. Ndihmon qeverinë në përgatitjet për pjesëmarrje në sesionet e Konferencës së Përgjithshme dhe të mbledhjeve të tjera ndërqeveritare, të organizuara nga UNESCO.
5. Nxit dhe zhvillon marrëdhëniet me Komisionet e tjerë Kombëtare për UNESCO-n, veçanërisht me ato në rajon, dhe merr pjesë së bashku me to në programe dhe studime të përbashkëta në interes të Republikës së Shqipërisë.

PËRBËRJA DHE STRUKTURA

Komisioni Kombëtar përbëhet nga, të shumtën, 30 anëtarë. Anëtarët e Komisionit Kombëtar propozohen dhe caktohen, me shumicë votash, nga Ministri i Punëve të Jashtme, Ministri i Arsimit dhe Shkencës dhe Ministri i Kulturës, Rinisë dhe Sporteve, për një periudhë, deri në 4 vjet, me të drejtë ricaktimi vetëm një herë. Kryetari i këtij Komisioni është Ministri i Arsimit dhe Shkencës.

Përbërja e Komisionit Kombëtar është si më poshtë vijon:

- a. Dhjetë anëtarë, përfaqësues të organizmave dhe institucioneve arsimore e shkencore të vendit.
- b. Pesë anëtarë, përfaqësues të organizmave dhe institucioneve kulturore të vendit.
- c. Tre anëtarë, përfaqësues të medias, gazetarë, etj.
- d. Katër anëtarë, përfaqësues të organizatave joqeveritare, që veprojnë në fushat e veprimtarisë së UNESCO-s.

- e. Jo më shumë se katër anëtarë, individë të shquar, personalitete të arsimit, shkencës, kulturës dhe medias.
- f. I Deleguari i Përhershëm pranë selisë qendrore të UNESCO-s në Paris dhe Sekretari i Përgjithshëm janë, gjithashtu, anëtarë të Komisionit Kombëtar.

Komisioni Kombëtar përbëhet nga organet e mëposhtme (shih skemën):

1. Asambleja e Përgjithshme e Komisionit Kombëtar përbëhet nga të gjithë anëtarët e këtij Komisioni. Ajo kryesohet nga Kryetari i Komisionit Kombëtar. Sekretari i Përgjithshëm i Komisionit vepron me cilësinë e Sekretarit të Asamblesë së Përgjithshme. Asambleja e Përgjithshme mblidhet të paktën një herë në vit dhe çdo herë tjetër sipas kërkesës së Kryetarit të Komisionit Kombëtar, ose prej shumicës së anëtarëve të saj, ose sipas kërkesës së Komitetit Ekzekutiv, me miratimin e Kryetarit të Komisionit Kombëtar.

Asambleja e Përgjithshme ka këto funksione:

- a. Miraton raportin e Komisionit Kombëtar dhe të organeve të lidhura me të, si dhe jep rekomandime dhe merr masa për zhvillimin e mëtejshëm të programeve dhe veprimtarive të këtij Komisioni.
- b. I jep rekomandime Kryetarit të Komisionit Kombëtar për zgjedhjen e anëtarëve të Komitetit Ekzekutiv dhe të Kryetarëve të nën/Komiteteve.
- c. Nxit lidhjen e ngushtë dhe bashkëpunimin ndërmjet Komisionit Kombëtar dhe departamenteve ministrorë, institucioneve të ndryshme arsimore, shkencore, kulturore dhe të informimit, agjensive, shoqatave profesionale, organizatave joqeveritare, universiteteve dhe qendrave të tjera kërkimore-shkencore.

2. Komiteti Ekzekutiv i Komisionit Kombëtar përbëhet nga Kryetarët e Komiteteve të Specializuara dhe kryesohet nga Kryetari i Komisionit Kombëtar. Sekretari i Përgjithshëm i Komisionit vepron si Sekretar i Komitetit Ekzekutiv. Komiteti Ekzekutiv mblidhet nga Kryetari i tij sa herë është e nevojshme.

Komiteti Ekzekutiv ka këto funksione:

- a. Merr vendime për zbatimin e programeve të Komisionit Kombëtar në periudhën ndërmjet sesioneve të Asamblesë së Përgjithshme.
- b. Këshillon qeverinë për kontributet e saj për planifikimin, ekzekutimin ose vlerësimin e programeve të veprimtarive kombëtare, rajonale, ndërkombëtare të UNESCO-s.
- c. Jep këshilla për ndjekjen e veprimeve të rekomanduara nga Konferencat e UNESCO-s, nga departamentet e organet qeveritare.
- d. Siguron mbikqyrjen e zbatimit të vendimeve dhe rekomandimeve të Asamblesë së Përgjithshme.

3. Komitetet e specializuara.

Komitetet e specializuara përbëhen nga anëtarët e Asamblesë së Përgjithshme. Ndarja e anëtarëve të Asamblesë nëpër Komitete bëhet me miratim të Kryetarit të Komisionit Kombëtar. Kryetarët e Komiteteve të specializuara zgjidhen me shumicë të thjeshtë votash nga anëtarët e Komitetit, në mbledhjen e parë. Anëtarët zgjidhen nga rradhët e

ekspertëve kombëtarë të fushave të arsimit, shkencës, kulturës dhe informimit. Komitetet mblidhen sa herë është e nevojshme.

Krijohen shtatë komitete të specializuara që mbulojnë fushat e mëposhtme:

- arsimit (përfshirë arsimin e lartë);
- shkencat natyrore dhe teknologjike;
- shkencat shoqërore-humane ;
- informacioni dhe komunikimi;
- gruaja dhe zhvillimi ;
- rinia dhe sportet ;

Komitetet e specializuara kanë këto funksione:

- a. I japin mendime këshillimore Komisionit Kombëtar dhe organeve të lidhura me të për çështje brenda përgjegjësisve të tyre.
- b. Përgatisin raporte, dokumenta dhe studime për programet e UNESCO-s, për konferenca e takime të organizuara nga UNESCO.
- c. Japin rekomandime, sipas kërkesave, për përgatitjen, zbatimin dhe vlerësimin e projekteve kombëtare në fushat përkatëse.

4. Komitetet ad-hoc

Për realizimin e detyrave të ndryshme, Komiteti Ekzekutiv mund të krijojë komitete ad-hoc. Qenia e tyre varet nga periudha e zgjatjes së veprimtarisë për të cilën ata janë krijuar.

5. Sekretariati i Përhershëm i Komisionit Kombëtar

Komisioni Kombëtar ka një Sekretariat të Përhershëm, i cili vepron si Sektor i UNESCO-s, në Ministrinë e Punëve të Jashtme. Në krye të Sekretariatit të Përhershëm është Sekretari i Përgjithshëm i Komisionit Kombëtar, në funksionin e Shefit të këtij Sektori.

Sekretariati i Përhershëm ka këto funksione:

- a. përgatit, në këshillim me Komitetin Ekzekutiv, projekt-programin vjetor e Komisionit Kombëtar.
- b. Bashkërendon veprimtarinë e Komisionit Kombëtar, si dhe përgatit raportin vjetor për këtë veprimtari.
- c. Siguron bashkërendimin dhe këshillimin ndërmjet Komisionit Kombëtar dhe institucioneve dhe agjensive qeveritare dhe joqeveritare;
- d. Harmonizon bashkëpunimin ndërmjet Komiteteve të Specializuara
- e. Nxit studimet dhe projektet në arsim, shkencë, kulturë e informacion, në bashkëpunim me komitetet e specializuara.
- f. Ndjek dhe siguron ekzekutimin sistematik të programeve të UNESCO-s, regjistrimin dhe arkivimin e tyre.
- g. Mban lidhje me Sekretariatit e UNESCO-s në Paris dhe Komisionet e tjerë Kombëtarë, të rajonit dhe më gjerë.

- h. Mban lidhje të rregullta me Delegacionin e Përhershëm të Republikës së Shqipërisë pranë UNESCO-s.
- i. Organizon, në bashkëpunim me organizmat e tjerë qeveritarë ose joqeveritarë, mbledhje dhe takime të UNESCO-s për çështje me interes të përbashkët.
- j. Përgatit planin e punës për mbledhjet e Komisionit Kombëtar.
- k. Në realizimin e korrespondencës me institucionet brenda dhe jashtë vendit, dokumentet e Sekretariatit të Përhershëm të Komisionit Kombëtar nënshkruhen vetëm nga Sekretari i Përgjithshëm.

MJETET DHE BURIMET FINANCIARE

Veprimtaria e Komisionit Kombëtar financohet dhe sponsorizohet nga subjekte e donatorë të ndryshëm, në përputhje me legjislacionin në fuqi.